



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) a u skladu sa članom 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH», broj: 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2009. GODINU SOCIJALDEMOKRATSKE PARTIJE BOSNE I HERCEGOVINE

Broj: 03-07-6-72/10
Sarajevo, 31.03.2011. godine

SADRŽAJ:

MIŠLJENJE REVIZORA	3
1. UVOD	3
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA.....	5
Predmet pregleda i kontrole.....	5
Cilj pregleda i kontrole	5
Obim pregleda i kontrole.....	5
4. PRETHODNE REVIZIJE	5
5. NALAZI I PREPORUKE	5
5.1. NALAZI.....	5
5.2. PREPORUKE	11

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja za 2009. godinu **Socijaldemokratske partije Bosne i Hercegovine**.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda, odnosno kontrole godišnjeg finansijskog izvještaja utvrđeno je da je Socijaldemokratska partija Bosne i Hercegovine prekršila odredbe člana 3. stav (1), člana 8. stav (1) i člana 11. stav (1) i (3) Zakona o finansiranju političkih stranaka.

Pregledom, odnosno kontrolom finansijskog izvještaja, osim gornjih napomena nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja za 2009. godinu Socijaldemokratske partije Bosne i Hercegovine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Socijaldemokratska partija Bosne i Hercegovine je ostvarila prihode u iznosu od 3.809.660,34 KM, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk. prihodu %
1	Članarina	304.903,25	8,00%
2	Prilozi fizičkih lica	17.866,68	0,47%
3	Prilozi pravnih lica	7.970,00	0,21%
4	Prihodi od imovine	646.670,67	16,97%
5	Prihodi od pravnih lica	0,00	0,00%
6	Prihodi od poklona	748,00	0,02%
7	Prihodi iz budžeta	2.620.335,98	68,78%
8	Ostali prihodi	12.056,56	0,32%
9	Projekti	199.109,20	5,23%
10	Ukupni prihodi:	3.809.660,34	100,00%

U godišnjem finansijskom izvještaju Socijaldemokratska partija Bosne i Hercegovine je iskazala ukupne rashode u iznosu 3.572.529,88 KM.

2. PREDSTAVLJANJE POLITIČKE STRANKE

Naziv političke stranke: Socijaldemokratska partija Bosne i Hercegovine. Skraćeni naziv stranke je SDP BiH.

Socijaldemokratska partija BiH je registrovana 16.03.1999. godine kod Kantonalnog suda u Sarajevu, pod brojem R-I-1/99.

Sjedište političke stranke je u Sarajevu, ulica Alipašina 41.

Lica ovlaštena za zastupanje stranke su Zlatko Lagumdžija, predsjednik i Nermin Nikšić, generalni sekretar stranke.

Lice ovlašteno za podnošenje finansijskih izvještaja za 2009. godinu je Ferid Buljubašić.

Prema podacima iz godišnjeg finansijskog izvještaja za 2009. godinu, organizacionu strukturu Socijaldemokratske partije BiH čine:

- Glavni odbor SDP BiH
- 10 kantonalnih odbora
- 5 regionalnih odbora

- 3 gradska odbora
- 89 opštinskih odbora
- Odbor SDP BiH Brčko Distrikt
- Forum mladih SDP BiH.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Socijaldemokratske partije Bosne i Hercegovine za 2009. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Socijaldemokratske partije Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka.

4. PRETHODNE REVIZIJE

Izvršena je revizija godišnjeg finansijskog izvještaja Socijaldemokratske partije BiH za 2004., 2006. i 2008. godinu i pregled godišnjeg finansijskog izvještaja za 2005. i 2007. godinu. Izdati su izvještaji o reviziji i izvještaji o pregledu sa nalazima revizije, mišljenjem revizora i preporukom da stranka treba postupati u skladu sa odredbama člana 3. stav (1), člana 5. stav (1), člana 6., člana 8. stav (1) i člana 11. stav (3) Zakona o finansiranju političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2009. godinu, utvrđeno je da Socijaldemokratska partija BiH nije ispoštovala preporuke date u izvještajima o reviziji, odnosno pregledu i da je u 2009. godini postupala suprotno odredbama člana 3. stav (1), člana 8. stav (1) i člana 11. stav (1) i (3) Zakona o finansiranju političkih stranaka.

5. NALAZI I PREPORUKE

5.1. NALAZI

a) Pregledom godišnjeg finansijskog izvještaja utvrđeno je da Socijaldemokratska partija BiH nije postupila u skladu sa odredbama člana 3. stav (1) Zakona o finansiranju političkih stranaka.¹

- Socijaldemokratska partija BiH je davala u zakup poslovne prostorije koje nisu u njenom vlasništvu i ostvarila prihod u iznosu od 31.220,40 KM.

¹ Prema odredbama člana 3. stav (1) Zakona o finansiranju političkih stranaka politička stranka može da se finansira iz sljedećih izvora finansiranja: članarina; priloga pravnih i fizičkih lica; prihoda od imovine u vlasništvu političke stranke; budžeta BiH za finansiranje parlamentarnih grupa u skladu sa članom 10. Zakona, kao i iz entitetskih budžeta i svih njihovih nižih jedinica u skladu sa entitetskim zakonima; dobiti od prihoda preduzeća u vlasništvu političke stranke.

Socijaldemokratska partija BiH je pod zakup izdala poslovne prostorije² u Zenici, Ulica Masarikova broj 48, a za koje ne raspolaže odgovarajućim dokazima o vlasništvu nad izdatim poslovnim prostorijama. Sredstva koja je primila Socijaldemokratska partija BiH od imovine koja nije u njenom vlasništvu³, u finansijskom izvještaju je prijavila kao prihod od imovine u vlasništvu političke stranke. Time što je ostvarila prihod od imovine koja nije u njenom vlasništvu, stranka nije postupila u skladu sa odredbama člana 3. stav (1) Zakona o finansiranju političkih stranaka.

- Stranka je u Općinskom odboru Maglaj ostvarila prihod u iznosu od 509,00 KM koji je iskazan na ostalim prihodima.

Uvidom u dostavljenu dokumentaciju utvrđeno je da je stranka navedeni prihod ostvarila po osnovu prodaje ulaznica koje je izradila u vlastitoj režiji za organizaciju zabavnog programa održanog dana 25.11.2009. godine u hotelu „Galeb“, a pojedinačna cijena ulaznica iznosila je 6,00 KM i 12,00 KM.

Time što je ova politička stranka ostvarila prihod iz izvora koji nije propisan Zakonom, postupila je suprotno odredbama člana 3. stav (1) Zakona o finansiranju političkih stranaka.

b) Pregledom godišnjeg finansijskog izvještaja utvrđeno je da Socijaldemokratska partija BiH nije postupila u skladu sa odredbama člana 8. stav (1) Zakona o finansiranju političkih stranaka.⁴

OO SDP BiH Goražde, je na svoj transakcijski račun primio sredstva od Općine Goražde u iznosu od 1.800,00 KM⁵. Navedeni iznos sredstava Općina Goražde je uplatila stranci kako bi stranka platila zakup poslovnih prostorija za Općinski odbor Socijaldemokratske partije BiH Goražde za 2009. godinu. U iznosu primljenih sredstava stranka je ostvarila zabranjeni prilog.⁶

Stranka je za svoj rad u 2009. godini, bez naknade koristila poslovne prostorije u vlasništvu Grada Mostara. Ugovorom broj: 05-258-3420/01 od 24.09.2001. godine Općina Mostar “Stari grad” je ovoj političkoj stranci dodijelila na korištenje poslovni prostor površine 30 m² u Ulici Kneza Salke Šestića broj 1 u Mostaru. Na osnovu Odluke o dodjeli u zakup, korištenju i održavanju poslovnih prostora u vlasništvu Općine Mostar - Zapad („Službeno glasilo Gradske općine Mostar-Zapad“, broj 9/01), kojom cijena poslovnog prostora na području Mostara za neprofitabilne i humanitarne organizacije iznosi 10 KM/m². Na osnovu navedene Odluke utvrđeno je da mjesečna zakupnina poslovnog prostora koji koristi SDP BiH OO Mostar iznosi 300,00 KM mjesečno, odnosno 3.600,00 KM

² Poslovni prostori u Zenici su izdati sljedećim pravnim i fizičkim licima: „Dubrovnik“ d.o.o. Zenica, „Forma“ d.o.o. Zanima, „Intercons“ d.o.o. Zanima, Advokat A. Dautbegović i Advokat Dalibor Tikvina.

³ Uvidom u izvod iz posjedovnog lista broj 301/03 koji je 01.12.2009. godine pod brojem 12-30-1843/09 izdala Uprava za imovinsko-pravne, geodetske poslove i katastar nekretnina Općine Zenica, a koji se odnosi na nekretninu – zgradu u Ulici Masarikova broj 48, utvrđeno je da se kao posjednik nekretnine vodi SIZ Stambeno preduzeće Zenica.

⁴ Državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu da finansiraju političke stranke.

⁵ Dopis Općine Goražde broj: 03-1-14-768/10 od 19.02.2010. godine.

⁶ Na osnovu akta Općine Goražde broj 03-1-14-768/10 od 19.02.2010. godine i priloga dostavljenih uz ovaj akt utvrđeno je da je Općina za 2009. godinu planirala dva granta za političke stranke i to: Grant za finansiranje parlamentarnih grupa u OV i Grant za finansiranje zakupa poslovnih prostorija parlamentarnim grupama u OV, sa kojeg su, isplaćena sredstva za zakup poslovnih prostorija stranci.

godišnje. Obzirom da stranka nije plaćala zakup navedenog poslovnog prostora ostvarila je prilog u iznosu od 3.600,00 KM, koji je zabranjen Zakonom o finansiranju političkih stranaka.

Općinskom odboru SDP BiH Sanski Most je dodjeljen na korištenje bez naknade, prostor površine 28 m² u poslovnoj zgradi Općine Sanski Most. Na osnovu Odluke o načinu plaćanja zakupa poslovnih prostora na području Općine Sanski Most („Službeni glasnik Općine Sanski Most“, broj 4/06, 6/07, 10/08 i 11/09), kojom je utvrđena cijena poslovnog prostora na području Sanskog Mosta za poslovne prostore površine od 25-60 m² sa cijenom od 10,00 KM/m² može se pouzdano utvrditi da mjesečna zakupnina poslovnog prostora koji koristi SDP BiH iznosi mjesečno 280,00 KM, odnosno 3.360,00 KM. godišnje. Time što ova politička stranka nije platila zakupninu za korištenje navedenog poslovnog prostora, u 2009. godini je ostvarila zabranjen prilog u iznosu od 3.360,00 KM.

Općinskom odboru SDP BiH Živinice je na osnovu Odluke o postupku davanja u zakup poslovnih prostora općinskog vijeća broj: 09-05-10100/07 od 27.11.2007. godine, dodjeljen na korištenje bez naknade, prostor površine 40 m² u poslovnoj zgradi Općine Živinice. Na osnovu Odluke o postupku davanja u zakup poslovnih prostora općinskog vijeća, kojom je utvrđena cijena poslovnog prostora na području Živinic za poslovne prostore sa cijenom od 3,00 KM/m² može se pouzdano utvrditi da mjesečna zakupnina poslovnog prostora koji koristi SDP BiH iznosi mjesečno 120,00 KM, odnosno 1.440,00 KM. godišnje. Time što ova politička stranka nije platila zakupninu za korištenje navedenog poslovnog prostora, u 2009. godini je ostvarila zabranjen prilog u iznosu od 1.440,00 KM.

Općinskom odboru SDP BiH Ilijaš je dodjeljen na korištenje bez naknade prostor površine 33,80 m² u vlasništvu Općine Ilijaš. Na osnovu Odluke o načinu i visini plaćanja zakupnine poslovnih prostora na području općine Ilijaš („Službene novine Kantona Sarajevo“, broj 2/00) za poslovne prostore sa cijenom od 8,00 KM/m², može se pouzdano utvrditi da mjesečna zakupnina poslovnog prostora koji koristi SDP BiH iznosi mjesečno 270,40 KM, odnosno 3.244,80 godišnje. Time što ova politička stranka nije platila zakupninu za korištenje navedenog poslovnog prostora, u 2009. godini je ostvarila zabranjen prilog u iznosu od 3.244,80 KM.

Općinskom odboru SDP BiH Novo Sarajevo je na osnovu Odluke o dodjeli u zakup poslovnih prostora na kojima pravo raspolaganja ima Općina Novo Sarajevo („Službene novine Kantona Sarajevo“, broj 29/07), dodjeljen na korištenje bez naknade prostor površine 102,20 m². Pomoćnik načelnika ove općine je u aktu broj: 03-23-1082/10 od 11.05.2010. godine koji je dostavljen na zahtjev Centralne izborne komisije BiH, naveo da bi u skladu sa odredbama člana 6. predhodno navedene odluke, za političke stranke cijena zakupnine iznosila 5,00 KM po m², u slučaju da iste nisu oslobođene od plaćanja. Time što ova politička stranka nije platila zakupninu za korištenje navedenog poslovnog prostora, u 2009. godini je ostvarila zabranjen prilog u iznosu od 6.132,00 KM.

Općinski savjet SDP BiH je na osnovu Ugovora o zakupu poslovnih prostorija, zaključenim 07.10.2009. godine sa Općinom Ilidža, koristio poslovni prostor površine 32 m², po cijeni koja je ugovorena u iznosu od 10% od početne cijene zakupa koja iznosi 20,00 KM za extra zonu odnosno u iznosu od 2,00 KM po m² uvećanoj za porez na dodatu vrijednost. Obzirom da se prema Ugovoru o zakupu sa Općinom Ilidža prostorije SDP BiH Ilidža nalaze u extra zoni ove općine gdje najniža cijena zakupa iznosi 20,00 KM po m², stranka je korištenjem poslovnog prostora u periodu od oktobra do decembra 2009. godine po cijeni koja je ispod cijene utvrđene navedenim Ugovorom, ostvarila prilog Općine Ilidža u iznosu od 2.022,00 KM.

Općinskom odboru SDP BiH Donji Vakuf je dodjeljen na korištenje bez naknade, prostor površine 30 m² u poslovnoj zgradi Općine Donji Vakuf.

Pored navedenih, poslovne prostore bez naknade su koristili i opštinski odbori SDP BiH: Novi Grad Sarajevo, Stari Grad Sarajevo, Lukavac, Jablanica, Fojnica, Visoko, Bosanska Krupa, Ključ, Derventa, Zavidovići, Breza, Brčko Distrikt.

c) Pregledom godišnjeg finansijskog izvještaja utvrđeno je da je stranka prekršila odredbe člana 11. stav (1) i (3) Zakona o finansiranju političkih stranaka.⁷

Finansijski izvještaj nije popunjen u skladu sa Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06).

- Evidencije i promet sredstava po transakcijskom računu na analitičkoj kartici Općinskog odbora Socijaldemokratske partije BiH Orašje ne odgovarju podacima sa izvornih dokumenata, odnosno izvodima. Ovakav način vođenja evidencija nije u skladu sa odredbama člana 11. stav (1) Zakona o finansiranju političkih stranaka.
- U obrascu 3-a finansijskog izvještaja (Prilozi fizičkih lica veći od 100 KM) stranka nije iskazala jedinstveni matični broj za jedno fizičko lice čime je prekršila odredbe člana 14. Pravilnika o godišnjim finansijskim izvještajima političkih stranaka.⁸
Takođe, u finansijskom izvještaju uočena je razlika od 1.709,00 KM između priloga fizičkih lica iskazanih u zbirnom obrascu ukupnih prihoda i pojedinačnim obrascima priloga fizičkih lica.
- U obrascu 3-b finansijskog izvještaja (Prilozi pravnih lica veći od 100 KM) stranka nije iskazala identifikacioni broj za jedno pravno lice, čime je prekršila odredbe člana 15. Pravilnika o godišnjim finansijskim izvještajima političkih stranaka.⁹
Takođe, u finansijskom izvještaju uočena je razlika od 200,00 KM između priloga pravnih lica iskazanih u zbirnom obrascu ukupnih prihoda i pojedinačnim obrascima priloga pravnih lica.
- U obrascu 3-c finansijskog izvještaja (Prihodi političke stranke od imovine) stranka nije iskazala prihod od imovine u iznosu od 1.800,00 KM.
Na osnovu raspoložive dokumentacije,¹⁰ utvrđeno je da je stranka izdavala u zakup poslovne prostorije, Opštinskom odboru Demokratskog narodnog saveza Bosansko Grahovo u 2009. godini. Po tom osnovu stranka je ostvarila prihod u iznosu od 1.800,00 KM koji nije prijavila, što je

⁷ Prema odredbama člana 11. stav (1) Zakona o finansiranju političkih stranaka, političke stranke su obavezne da vode evidencije o svojim prihodima i rashodima.

U skladu sa odredbama člana 11. stav (3) Zakona o finansiranju političkih stranaka, stranka podnosi finansijski izvještaj u formi koju odobri Centralna izborna komisija, a u skladu s tim donesen je Pravilnik o godišnjim finansijskim izvještajima političkih stranaka kojim su propisani sadržaj i forma finansijskog izvještaja („Službeni glasnik BiH“ broj 61/06).

⁸ U skladu sa članom 14. Pravilnika o godišnjim finansijskim izvještajima političkih stranaka u obrazac 3-a (Prilozi fizičkih lica veći od 100 KM) unose se sljedeći podaci: naziv organizacionog dijela političke stranke, ukupan iznos priloga čija je pojedinačna vrijednost manja od 100 KM, prezime i ime donatora čiji je prilog veći od 100 KM, jedinstveni matični broj donatora, datum kada je prilog dat i iznos priloga.

⁹ U skladu sa članom 15. Pravilnika o godišnjim finansijskim izvještajima političkih stranaka u obrazac 3-b (Prilozi pravnih lica veći od 100 KM) unose se sljedeći podaci: naziv organizacionog dijela političke stranke, ukupan iznos priloga čija je pojedinačna vrijednost manja od 100 KM, naziv pravnog lica čiji je prilog veći od 100 KM, ID broj dobijen od nadležnog poreskog organa, datum kada je prilog dat i iznos priloga.

¹⁰ Izvod sa transakcijskog računa broj 159 Demokratskog narodnog saveza i Ugovor o zakupu.

suprotno odredbama člana 16. Pravilnika o godišnjim finansijskim izvještajima političkih stranaka.¹¹

Stranka je takođe u 2009. godini evidentirala prihod od imovine u iznosu od 600,00 KM po osnovu izdavanja garaže u zakup. Obzirom da prema ugovoru isti stupa na snagu 01.01.2010. godine, to se prihod od imovine u iznosu od 600,00 KM tretira kao prihod iz 2010. godine i isti je adekvatnim evidentiranjem trebao biti raspoređen na dvanaest mjeseci u 2010. godini. Ovakvim načinom evidentiranja prihoda stranka je postupila suprotno odredbama člana 11. stav (1) Zakona o finansiranju političkih stranaka.

- Socijaldemokratska partija BiH u godišnjem finansijskom izvještaju za 2009. godinu kao prihod nije iskazala sredstva u iznosu od 124.012,00 KM.
Navedena sredstva stranci je u 2009. godini uplatila Općina Jajce po presudi Općinskog suda u Bugojnu, broj: 046-1-P-06-000215 od 10.04.2007.godine. Naime stranka je pred ovim sudom pokrenula postupak protiv Općine Jajce i Općinskog odbora Hrvatske demokratske zajednice BiH Jajce radi naplate zakupnine za poslovni prostor koji su u periodu od 01.01.2001. godine do 31.12.2006. godine koristile Općina i navedena politička stranka, a za koje SDP BiH tvrdi da su njeno vlasništvo. Sud je u ovom predmetu utvrdio i tuženoj strani naložio da Socijaldemokratskoj partiji BiH na ime naknade štete za korištenje poslovnog prostora isplati iznos od 95.830,00 KM i iznos od 28.182,00 KM na ime zateznih kamata i sudskih troškova. Time što stranka nije prijavila ovaj prihod u finansijskom izvještaju postupila je suprotno odredbama člana 13. stav (4) Pravilnika o godišnjim finansijskim izvještajima političkih stranaka.¹²
- U obrascu 3-f finansijskog izvještaja (Prihodi iz budžeta) stranka je iskazala sredstva u iznosu od 313,34 KM od Općine Prača-Pale. Prema podacima Opština Novo Goražde/Ustiprača, sredstava je uplatila navedena opština, a ne Općina Prača-Pale kako je iskazano u finansijskom izvještaju, što je suprotno odredbama člana 19. stav (2) Pravilnika o godišnjim finansijskim izvještajima političkih stranaka.¹³
- U obrascu 4-1 finansijskog izvještaja (Režijsko-administrativni i ostali troškovi) stranka je za Odbor Brčko Distrikt iskazala finansijske rashode u jednom zbirnom iznosu od 24.913,00 KM. Kontrolom je utvrđeno da iskazane finansijske rashode čine različite vrste troškova. Neiskazivanje troškova po vrstama je suprotno odredbama člana 21. Pravilnika o godišnjim finansijskim izvještajima političkih stranaka.¹⁴

Na osnovu navedenog utvrđeno je da stranka nije vodila adekvatne evidencije o svojim prihodima i rashodima, i da u godišnjem finansijskom izvještaju nije iskazala sve prihode koje je ostvarila u

¹¹ U skladu sa članom 16. Pravilnika u obrazac 3-c (Prihodi političke stranke od imovine) unose se sljedeći podaci: naziv organizacionog dijela stranke, vrsta imovine na osnovu koje se ostvaruju prihodi, korisnik imovine političke stranke, broj ugovora, odluke, rješenja, iznos ostvarenog prihoda i iznos sredstava koji je politička stranka naplatila.

¹² U skladu sa članom 13. stav (4) Pravilnik o godišnjim finansijskim izvještajima političkih stranaka, ako politička stranka ostvari prihod koji nije obuhvaćen u stavu (1) ovog člana, dužna je da uz obrazac 3 dostavi specifikaciju koja će sadržavati: naziv organizacionog dijela političke stranke, osnov i vrstu ostvarenog prihoda, iznos prihoda i druge činjenice kojim se dokazuje da ostvareni prihod nije moguće iskazati u prihodima navedenim u stavu (1) ovog člana.

¹³ U skladu sa članom 19. stav (2) Pravilnika o godišnjim finansijskim izvještajima političkih stranaka, u obrazac 3-f (Prihodi iz budžeta) unose se sljedeći podaci: naziv organizacionog dijela političke stranke, naziv nivoa vlasti, broj i datum odluke i ukupan iznos prihoda.

¹⁴ U skladu sa članom 21. Pravilnika o godišnjim finansijskim izvještajima političkih stranaka, u obrazac 4-1 (Režijsko-administrativni i ostali troškovi) unose se sljedeći podaci: naziv organizacionog dijela političke stranke, vrsta troška, konto i iznos.

2009. godini, čime su prekršene odredbe člana 11. stav (1) Zakona o finansiranju političkih stranaka.

Napomene:

- a) Socijaldemokratska partija BiH je primila sredstva od inostranih donatora u iznosu od 199.109,20 KM, što je prikazano u narednoj tabeli:

Red.br.	Donator	Iznos priloga
1.	Laburisti Velike Britanije	153.669,60
2.	S-Kvinnor Soc.Švedske	22.902,77
3.	Olof Palme Švedske	22.536,83
4.	UKUPNO:	199.109,20

- Stranka je sredstva ostvarila na način što je aplicirala kod Laburističke partije Velike Britanije za finansiranje projekata „Lokalna politika za bolji život“, radi pribavljanja sredstava za finansiranje projekata čiji je cilj: kreiranje finalnog seta lokalnih politika, posjete ruralnim i manje razvijenim oblastima i putem održavanja radionica.
 - Kod S-Kvinnor Štokholm Socijaldemokratska partija BiH je aplicirala radi pribavljanja sredstava za finansiranje projekata podrške demokratizaciji žena u Bosni i Hercegovini i jačanja kapaciteta socijaldemokratkinja za političko djelovanje u vezi problema koji najviše pogađaju žene u Bosni i Hercegovini.
 - Kod Olof Palme International Center Socijaldemokratska partija BiH je aplicirala radi pribavljanja sredstava za finansiranje projekata „Pravda radnicima sad“ s ciljem poboljšanja pozicija radnika u BiH kroz smanjenje broja smrtnih slučajeva na radnom mjestu i povreda na radu, jednak pristup porodiljskoj zaštiti i smanjenje kršenja radničkih i sindikalnih prava.
- b) Socijaldemokratska partija BiH je u finansijskom izvještaju kao prihod od imovine stranke, iskazala prihod koji je ostvarila iznajmljivanjem poslovnih prostora koje ova politička stranka posjeduje, koristi i njima raspolaže, a za koje nisu riješeni vlasničko-pravni odnosi. Za većinu nekretnina u zemljišnoknjižnim izvadcima je upisano da su u državnoj svojini, a Socijaldemokratska partija BiH kao pravni sljednik Saveza komunista Jugoslavije – C.K Saveza komunista BiH, je upisana kao korisnik nekretnina, dok je na dijelu nekretnina na ovu političku stranku upisano pravo raspolaganja.¹⁵
- Socijaldemokratska partija BiH, kao pravni sljednik Saveza komunista BiH koristi nekretninu, odnosno poslovnu zgradu u Sarajevu, u ulici Alipašina 41. Pored toga što koristi poslovne prostorije za svoj rad, Socijaldemokratska partija BiH je dio zgrade iznajmila Vladi Federacije Bosne i Hercegovine, pa je od zakupnine ostvarene na ovaj način u 2009. godini ostvarila prihod od 423.635,88 KM. Uvidom u zemljišnoknjižni izvadak broj LV/268 od 22.03.2005. godine, utvrđeno je da je nekretnina – zemljište na kome je izgrađena poslovna zgrada, upisana u B. Vlasničkom listu kao državna svojina, a u C. Teretnom listu uknjiženo je pravo korištenja radi

¹⁵ Član 2. Zakona o vlasničko-pravnim odnosima („Službene novine FBiH“ broj 06/98) vlasništvo tretira kao pravo da se stvar (pokretna i nepokretna) posjeduje, koristi i da se njome raspolaže sukladno s njenom prirodom i namjenom.

podizanja poslovne zgrade na zemljištu iz A. Popisnog lista, u korist Saveza komunista Jugoslavije C.K. Saveza komunista BiH Sarajevo.

Na osnovu prijedloga Socijaldemokratske partije BiH od 12.05.2004. godine za uknjižbu prava građenja na zemljištu državne svojine, Općinski sud u Sarajevu je dana 23.03.2005. godine donio Rješenje broj DN-5063/04, kojim se dozvoljava uknjižba prava korištenja u novi z.k. uložak, nekretnina upisanih kao državna svojina na kojima je pravo raspolaganja do tada imala Općina Centar Sarajevo, radi podizanja poslovne zgrade na navedenom zemljištu u korist Saveza komunista Jugoslavije C.K. Saveza komunista BiH Sarajevo. Rješenje je dostavljeno Socijaldemokratskoj partiji BiH, kao predlagaču uknjižbe, Općini Centar Sarajevo, katastru i upravi prihoda.

- Socijaldemokratska partija BiH je u 2009. godini davala u zakup prostorije u poslovnom objektu koji se nalazi u u Tuzli, čiji je ona organ korištenja, pri čemu je ostvarila prihod u iznosu od 28.301,28 KM.¹⁶

Pregledom zemljišnoknjižnog izvotka Katastarske općine Tuzla broj 7868, utvrđeno je da je nekretnina upisana u A. Popisni list – zgrada i zemljište, u B. Vlasničkom listu upisana kao društvena svojina, s time da je organ korištenja nekretnine Socijaldemokratska partija BiH, Opštinski odbor Tuzla. Također, uvidom u Izvod iz prepisa posjedovnog lista broj 1952 izdatog 11.05.1995. godine, utvrđeno je da korisnik nekretnine SDP BiH, Opštinski odbor Tuzla.

5.2. PREPORUKE

Preporučuje se Socijaldemokratskoj partiji BiH da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- ***da postupa u skladu sa odredbama člana 3. stav (1) Zakona o finansiranju političkih stranaka, odnosno da se ne finansira iz izvora finansiranja koji nisu propisani Zakonom,***
- ***da postupa u skladu sa odredbama člana 8. stav (1) Zakona o finansiranju političkih stranaka, odnosno se ne finansira priložima koji su zabranjeni ovim Zakonom,***
- ***da postupa u skladu sa odredbama člana 11. stav (1) i (3) Zakona o finansiranju političkih stranaka, odnosno da vodi računa o prihodima i rashodima i da finansijske izvještaje sastavlja i dostavlja Centralnoj izbornoj komisiji BiH u skladu sa Pravilnikom o godišnjim finansijskim izvještajima političkih stranaka i***
- ***da riješi pitanje vlasničko-pravnih odnosa nad nekretninama koje posjeduje, koristi i sa njima raspolože sukladno s njihovom prirodom i namjenom.***

KOMENTAR

U ostavljenom roku, Socijaldemokratska partija BiH se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2009. godinu. Služba za reviziju je razmotrila primjedbu stranke za Općinski odbor Gradačac na nalaz u kome je navedeno da se ovaj odbor nije finansirao iz Zakonom propisanih izvora i da stranka prihode od imovine nije evidentirala prema ugovorima o zakupu poslovnih prostora. Obzirom da je stranka uz očitovanje dostavila adekvatne dokaze za navedene primjedbe i iste djelimično otklonila, ispravke su ugrađene u konačni izvještaj o pregledu.

¹⁶ Poslovni prostori u Tuzli su izdati pod zakup sljedećim pravnim i fizičkim licima: „Task“ d.o.o. Tuzla, „Primax“ d.o.o. Tuzla, SUR „Mocart“ Tuzla, Krojačkom salonu „Zlata“ Tuzla, Advokatu Bahriji Dautoviću i advokatici Milki Tomić.

Služba za reviziju finansiranja političkih stranaka u Centralnoj izbornoj komisiji BiH je razmotrila i druge primjedbe iz očitovanja koje su potkrijepljene neadekvatnim dokazima i nisu utemeljene na relevantnim činjenicama, te stoga nisu uticale na nalaz revizije.

Mr. Hasida Gušić, šef Službe za reviziju

Veliborka Kravljača, revizor

Anela Burdžović Kapić, pomoćnik revizora